

《中國地方藝文薈萃》編輯委員會 編

廣西人民出版社

中國地方藝文薈萃

桂東卷·第一輯 歌

華東卷・第一輯
肆

中國地方藝文薈萃

《中國地方藝文薈萃》編委會 編

第四冊目錄

明練音續集十卷首一卷末一卷（二）	．．．．．	一
練音集補四卷首一卷附卷一卷外卷一卷	．．．．．	一四一
邗上題襟集不分卷	．．．．．	三七三

明練音續集十卷首一卷末一卷（二）

明練音續集十卷首一卷末一卷（二）

（清）王輔銘輯

據清雍正爾雅堂刻本影印。

明練音續集卷八

嘉定 王輔銘 翌思 采

閔 裴

裴字百先號裴村黃陶菴先生序其裴村遺稿
曰裴家世力田至裴乃學制舉業不就去學詩
詩成乃大困然好之益力嘗往來吳越間以篇
咏自娛其居家或爲童子師或田作自給事母
孝撫二弟有恩人有饋之者未嘗固拒或挾富
貴衣食之輒拂衣去亦以此取怒於人至推隲
溝中跛其一足所居老屋數椽竹廚土銚鋪糜
不給日仰屋梁語雖呼之不應其詩清而不瘠

日錄卷之八
質而不俚一唱三歎有古者衡門詩人之風既
爲之序復募同志醵金鋟版行於世

栖真寺

舟行桑岸低取徑入溪口雨中溪轉深寺冷藏林藪曲
折成水趣蘆高碧齊柳入門見老僧默誦一燈守古壁
引新蘿窻戶衆陰厚水上得此君在山亦罕有

麟湖釣叟歌

荻花將落風颼颼夕陽映見湖西樓湖裏老人坐孤舟
看雲忽斷青松頭手持竹竿未輕投釣絲風颼去悠悠
三寸白魚不上鉤

打松子

呼童入山打松子斜陽正照空山裏長竿纔及松之半
打折枯枝與橫幹香吹松子垂垂落驚動高樓雙白鶴
鶴聲飛起亂松濤山下幽人倚高閣

吳塘遲郁豫始不至

別時約我九月節重到吳塘看紅葉舍南舊有十數株
早霜一夜林光攝開門爲語林中弟前客相期此月至
東房敗壁好新泥試看牀前酒熟未樹樹村村紅未飄
蒙頭望汝立寒橋再遲十日無來信老懷空聽雨蕭蕭

南渡別吳鳴球

河邊相送罷招手一船開濕岸殘潮落霜林短日催蘆
花隨雪老柳信逐江來寂莫吳塘路無人問草萊

管待菴學博齋中晚坐

階面桐陰積無風竟日清
官閒虛晝柝齋冷雜溪聲
一笑容疎懶相知惜老成
披帷涼月上搖扇葛衣輕

寄侯豫瞻

家聲馳孝友國論允銓衡
仲叔貧無累山公鑒獨清
官廉能酌水人老尚躬耕
出處休相誚雲泥各有情

懷黃蘊生

爲我家居薄年年餉酒資
不求舉世識無憾一人知
香圃耕春雪新堂斲晚芝
好尋黃叔度相對共論詩

得葉石農入吳信

欲待茶收穀雨邊
家山花事出門憐
能驚離別惟春暮

倍惜風光是老年柳雨送鶯過野店麥風吹燕下江船
期君到日逢新漲一路嚴溪似碧天

金爾宗詒詩問園梅開信次韻答之

投詩向我問園梅經歲咨嗟遠夢催十日春風將有信
一宵冰雪未能開漸因籬插妨游屐亦喜枝斜裹凍苔
興引月明東閣夜吟聲遙聽隔香來

送春

匆匆春事又蹉跎相送其如風雨何宿酒昨朝猶未醒
落花今夜已無多正添離恨殘鶯喚況值傷心戲蝶過
欲託微詞寄遠道髣髴絲零亂不成歌

舟過秋水莊

草堂初就屢相招拏得扁舟趁晚潮風入葦花深水屋
日斜紅葉近村橋冬蔬小摘將成圃寒柳新移漸著條
更羨傍溪桃李徑向春游屐往還饒

寄葉石農

旅食經冬可柰何出山書至早梅過潮通石浦春橫艇
雪覆香茅冷挂蓑末路親知堪涕洟老年游興易蹉跎
青青楊柳錢塘曉細雨橋邊憶放騾

答黃蘊生

冷淡柴門人罕至新詩持比翠琅玕花翻細藥微風在
果落朱櫻小雨寒老眼獨憐親幼稚病身空自想巉岏
方秋憶汝秦淮路走馬河堤月滿鞍

再過檀園

亭館蕭閒風日臨寒園葉盡踏空陰酒杯不放秋心暇
筆墨能兼老興深別去林廬仍再夢重來花徑似難尋
爲歡取醉斜陽下蓬髯相憐白半侵

吳自惺

自惺字元咫號葦菴本歙縣人祖父以賈占籍
邑之南翔父早世母九熊訓子口授經義年十
七補博士弟子員崇禎壬午副榜以恩例貢大
廷旋逢鼎革黃冠野服堅辭徵辟庶幾謝臯羽
鄭所南之遺風焉所著有湖山隨筆

吳鐵菴先生云葦菴淹貫經
子博通二氏自號三教布衣

訪求隱逸邑先輩以賤姓名上徵書賦此爲謝
薄俗浮生與世違敢云高隱卧漁磯閒來抱甕滋松薤
醉後揮毫話薺薇問渡桃源聊寄興尋僧竹院久忘機
新朝羅網多寬大賸得先朝老布衣

晚眺秋園

散步荒郊物外身落花狼藉草成茵十年陵谷移三姓
一望烟霞繞四鄰荻岸池亭暝欲合蓮塘魚鳥晚偏親
滿園秋色誰能鎖風月何嘗屬主人

曹昭遠

昭遠本姓張字雅白一字硯公其廉族子善詩
文與張德一吳自惺號槎溪三雋有花溪紀年

詩草

和王簡平見寄

三峽詞源水倒流
幸逢東野願低頭
連牀夜雨頻酬唱
揮麈春風費講求
竹葉分香斜日映
寒花落翠晚雲收
別來長憶平原飲
折盡花枝當酒籌

五十初度漫興

衰病年來覺更加
蝸名蠅利總浮華
呼童檢日勤移竹
對案抄書學種花
白眼向人還自笑
青雲入夢轉成賒
剗形漸欲棲禪寂
前路迢迢苦望崖

候黃山程孟闇過山居

十五年前折柳枝
殷勤曾唱渭城詞
共憐驥老心猶壯

不覺駒馳鬣已絲芳草春風空入夢梨花夜雨獨題詩
遲君一櫂衝風至紅燭清尊話舊時

題叢桂軒二首

萬竿寒玉子雲居滿院花香四壁書我亦偶然來看竹
三年不忍賦歸與

梅花十畝桂三秋中有人披五月裘好客不嫌頻倒屣
香清茶熟酒新篘

張德一

德一字吉士幼從塾師讀書澹園作澹生說及
憫旱賦深爲前輩激賞游庠試輒高等與羅溪
王道通爲莫逆交手定簡平子集鏤版藏於家

歿後無嗣遺書罕有存者

古詩

四首
錄一

逝水不復西明星有時落榮華苟不謝千秋爲誰作赫
赫臺榛莽填丘壑揚揚五陵子身後惟城郭達觀
良已殊安用慰蕭索一尊陶柴桑千年謝康樂榮名永
不朽孤藻振寥廓

題樊舞陰廟

將軍少年混狗屠鼓刀立市生計麤一朝奮起從劉季
贏得勲名落天地只今古廟空江頭洪濤白日令人愁

秋夜露坐

小院秋偏早長臯夜更空暝煙啼絡緯寒月濕梧桐感

舊孤琴冷懷人短袖紅欲眠殊未忍花氣轉濛濛

夢中作

十月朔旦夢與簡平賦詩簡平得起句下即信口足成之錄寄簡平

我愛青天好排雲送月來并梧千葉盡籬菊一枝開綠
酒酣還酌清歌歇又催寒江孤棹遠懽極不知回

宿儻齋曉題

松梢壓雪照寒窓驚破閒情鵲一雙猶記夜來唵興發
紅蘭題徧隔湘江

張夢符

夢符字仲素原名鴻輝少治博士家言兵後逃
於詩酒偕其從弟鴻磐結社槎溪彷彿七賢六
逸弟鴻生字亦仲有宜雨軒藁